

四庫全書

集部

欽定四庫全書

明詩綜卷十九

翰林院檢討朱彝尊編

姚廣孝

四首

廣孝長洲人幼名天禧既為僧名道衍字斯道
洪武中以高僧應選侍燕邸永樂初論靖難功
為僧錄左善世加太子少師復姓賜今名卒贈

榮國公諡恭靖有逃虛子集

高李迪云衍公詩
險易竝陳濃淡迭

顯能兼采衆家不事拘狹 俞汝成云少師詩
縱淺近宜傳 顧玄言云恭靖性空思玄心寂
語新惠休法振不得專譽禪藻 蔣仲舒云少
師棲遁禪宗中嬰世網既參佐命卒叛初服互
逃儒釋之間未獲進退之所其詩如忉利天
雖自快樂未就解脫魔障既深終當墮落

靜志居詩話少師與十高僧同徵當時孝陵知
人則哲何不移來復之誅誅之考前代桑門得
預軍謀者若佛國澄道安鳩摩羅什支曇猛竺
朗皆非盛世之事少師獨早著才稱晚參惟愜
文與北郭十友之林武居靖難諸臣之首咄咄
怪事觀其入燕兩謁劉太保墓賦詩云良驥色
同羣至人迹混俗知已苟不遇終世不怨離偉
哉藏春公簞瓢樂巖谷一朝風雲會君臣自心
腹大業計已成勛名照簡牘身退即長往川流
去無復佳城百年後何人敢樵牧斯人不可作

再拜還一哭蓋早
以藏春子自况矣

荅楊孟載

樓樓泊城南春深抱幽獨餘花猶綴紅衆樹已滋綠
茲因塵內居始憶山中屋何時陪騎游吟看舊題竹

送友人之松江

潮來沙磧平月落海門曙汀蒲轉風葉堤柳搖煙絮
江頭春可憐天涯人獨去有歌送君行無酒留君住
雪浪沒沙鷗雲帆出江樹回首讀書堆青山不知處

題秋寺晚晴圖

援將朔吹哀雲帶溪流駛相送獨歸僧蕭蕭夕陽寺

秋蝶

粉態凋殘抱恨長此心應是怯淒涼如何不管身憔悴
猶戀黃花雨後香

解 縉 三首

縉字大紳吉水人洪武戊辰進士試中書庶吉

士尋除御史謫河州衛吏旋待詔翰林永樂初

進侍讀學士直文淵閣預機務逾年進翰林學士出為廣西參議改交趾入奏事會太宗北征見東宮辭去為高煦所譖徵下獄命獄吏沃以

燒酒薶雪中死有春雨齋集

楊東里云大紳詩豪宕豐贍頗似李

杜

黃廷臣云學士古體詩入太白集中孰別其為近時之作蔡翔云先生詩豪縱放逸一

自胸中流出譬

之長江大河一瀉千里覽者為之心驚目駭李賓之云學士才名絕世詩無

全橐傳者真偽相半頃令觀者有楓落吳江之歎

廖玄素云學士興會所到肆意成章水搏蛟蚪陸剝犀象淵乎其不窮浩乎其有餘高皇智屈羣策親如善長貴如廣洋惟庸近侍如安

如濂如觀如素雷霆所擊罔不震懾學士以一
少年萬言批鱗靡所忌諱而聖度優容令其進
學才難之數猶可想見也徐子元云大神獨
駕青鸞翱翔八極使謫仙遇之當懸榻以待
王元美云解大神如河朔大使鬚髯戟張與之
周旋酒食信父俞汝成云解學士才冠一時
積學尤富發為詩文宜無與敵乃多率意遣辭
不事磨鍊若信筆游戲者然蓋在國初風會習
尚使然也穆敬甫云解詩如塵起朱輪風生
鯨鱗乃詩中貴游也李時遠云學士天質甚
美詞鋒甚銳但少
溫厚和平之氣

詩話明初詩傳者多失真如楊廉夫題鍾山作
此吾鄉朱山人純詩也解學士題虎顧衆彪圖
則又廉夫之詩也乃說詩者謂太宗幾欲廢嫡
見詩而止傳會之言殊堪發笑學士詩敏捷不

大推敲其言曰寧為有瑕玉莫作無瑕石其立意固如是矣然就近體而論如細雨乍過西掖樹熏風遙聽上林鶯青山拍拍風沙滿紅葉蕭蕭浦樹稀三千歲後桃花老二十四橋秋水通天連銅柱蠻烟黑地接珠厓海氣黃粵女艷妝爭卅髮佳人村鼓共鳴銅青山遠道遙相送畫舫中流獨自歸千家竹屋臨沙嘴萬斛江船下石頭未嘗不符作者亦何至叫踴隱突若世所傳詠物諸詩眾慈皆歸皆由敏捷召之乃知騷裏以迅驟為主鷹隼以輕疾為妙張純之言大論非篤

彭澤

青山圍一縣隱隱見人家亂石邊江出孤帆帶日斜翠

添官舍柳香泛驛樓花不見陶彭澤湓城起暮鴉

寄黃玄齋

來時蕭峽駐輕舟惆悵初年作遠遊夢裏相思不相見
武功山下月輪秋

龍州

波羅蜜樹滿城闌銅鼓聲喧晝賽神黃帽葛衣墟市客
青裙錦帶冶游人

楊士奇

十七首

士奇名寓以字行泰和人建文時以辟召入翰
林永樂初改編修入直文淵閣累官少師華蓋
殿大學士贈太師諡文貞有沙羨石臺東里諸

集

楊弘濟云東里歌頌太平未嘗不致儆戒之意至於觸物起興亦莫不各極其趣體製音

響皆發乎性情非求之工巧者比李賓之云文貞學杜間得魏晉遺意徐子元云東里格

調清純實開西涯之派王元美云楊東里如流水平橋粗成小致胡元瑞云楊文貞文敏

胡文穆金文靖皆大臣有篇什者頗以位遇掩之詩體實平正可觀蔣仲舒云少師韻語妥

協聲度和平如潦倒書生雖酬酢雅馴無復生氣

詩話東里優游按衍諸體皆蘊藉可觀其自序
云古之善詩者粹然一出於正用之鄉閭邦國
皆有裨於世道夫詩志之所發也三代公卿大
夫下至閭閻女子皆有作以言其志而其言可
傳余早未聞道既溺於俗好又往往不得已而
應人之求即其志之所存者無幾也亦可謂能
自訟
矣

送尤文度歸吳中

我友整遐裝
將起旋歸平
明發城邑率
彼東路馳爰
與二三子祖
餞臨郊岐中
觴趣分袂恨
恨使我悲嚶
鳴
求其友竊慕
伐木詩平生
攜手好何為
中仇離行當
阻

川岫安得睹光儀情敦思苦深久要諒不遺各言崇令
德庶保黃髮期

漢江夜泛

汎舟入玄夜奄忽越江干員景頽西林列宿粲以粼凝
霜飛水裔回颿蕩微瀾孤鴻從北來哀鳴出雲間時遷
物屢變游子殊未還短褐不掩脰歲暮多苦寒悠悠念
行邁慊慊懷所歡豈不固時命苦辛誠獨難感彼式微

詩喟然興長歎

李舒章云楚楚
自好不失選體

同蔡尚遠尤文度朱仲禮楊仲舉蔡用嚴游東山
步出城東門逍遙望雲巘累月懷佳遊茲晨遂登踐梵
宇繞層阿飛樓凌絕峴方塘涵湛碧喬林茂敷衍繚翳
幽莫通丰茸紛不剪攀磴窮高躋緣逕屢回轉是時微
雨收輕霞澹舒卷睇遙素橫川俯夷綠盈畎陟降體自
便顧睇心已緬况接曠士言復偶釋子辯析空理弗昧
違喧抱逾展何因此間棲永令浮慮遣

永豐曾氏龍潭

開軒面澄潭潭水綠於染其下蟠蛟蚪四時興有淦嘉
樹羅蔥蒨煙霞互舒斂晴漪漾春牖涼颼舍暑簟俗轍
謝經過書卷恒不掩探微心有得行素道無歉逍遙視
天宇油雲馳冉冉庶跂沂上樂誰當歎與點

題劉逸人樂耕卷

理生雖異業居世皆有務治本既在茲食力余所慕九
扈春始鳴興言向田墅初來正溝塍爰方藝禾黍雖有
耘耨勞三時足甘雨歲功聿已成屢豐報田祖儲峙何

必多取具充寒暑有酒可同歡時時會鄰父既醉去悠然登高睇平楚一為擊壤謠游心緬千古

雨中寄鄒仲熙

炎月苦淫雨抱疾坐幽居淖泥橫隘巷流潦溢深渠已絕還往迹遂將人事疎時聞黃鳥鳴交交屋東隅豈無斗酒酌閒玩古人書興懷在君子夙昔同歡娛契誼託金蘭清德重璫璣跬步不可即而況千里餘仰瞻白日暉屏翳何由舒念離余未弭單居子何如

題費同知松樹障子

當代畫松誰最精王紱卓迪俱馳聲兩生以來鮮繼者
鳳池周璿新得名此圖筆有千鈞力全幅剡藤開潑墨
雙株奮起如雙蚪直氣森森勢千尺樛枝屈鐵蟠穹蒼
勁節磊砢鱗甲張長風颯颯動滿座六月清晝高堂涼
吉安別駕好奇古對此宛然巖壑趣茯苓琥珀焉足期
堅操終懷共遲暮別駕別駕臨安彥浙東山東宦游徧
四明徂徠千歲植所歷山林屢嘗見大材之成由化工

自古匠輪希得逢明堂清廟選梁柱何限空老深山中
賦得滄浪送陳景祺守襄陽

漢水帶襄城滄浪舊有名分符來五馬如練照雙旌濟
涉思為楫聽歌想濯纓須令郡人說堪比使君清

荅黃宗載

又是三年別新來百感增薰蕕安可問枿鑿苦難勝白
髮落垂盡青山歸未能故人贈佳句擬報玉壺冰

夜發清江口

日落煙水寒解纜清江渚中夜北風來相送潭州去

過谷亭

明月轉檣竿露下孤蓬溼欲繫谷亭舟沙頭風正急

夾溝遇邑人

聞道故鄉來辭家今遠近恐有南京書停舟試相問

題鄂渚贈別

鸚鵡江中紅樹鳳皇城裏青山借問來游幾日秋水蘭

舟獨還

三十六灣

湘陰縣南江水斜春來兩岸無人家
深林日午鳥啼歇
開遍滿山紅白花

宣德丙午謁二陵

二首

去年侍從謁長陵
此日重來慟倍增
春柳春花渾似昔
獻陵陵樹復層層

君恩追憶不勝哀
老淚乾枯病骨摧
陵下一來腸一斷
餘生知復幾迴來

過城陵磯

城頭水落石層層石上魚橋半搭罾
忽望高樓出城郭
舟人指點說巴陵

楊 榮 三首

榮初名子榮字勉仁建安人建文庚辰進士除翰林編修靖難後入直內閣更今名累官工部尚書謹身殿大學士加少師卒贈太師諡文敏
有雲山小橐靜軒退思等集

詩話東楊詩頗溫麗上擬
西陽不及下視南陽有餘

題馮敏山水圖

鳳池仙客天機精
筆端點染真天成
想當適意自盤礴
呼吸造化含元英
欣然寫此得佳趣
雲水微茫帶烟樹
左拏右攫森相樛
恍若蛟龍飛不去
懸厓峭壁不可攀
岌嶇直入霄漢間
幽亭卜築在深處
塵氛不到清晝閒
是誰蕭散事游賞
短櫂輕舟自來往
晚風不動碧波平
激灩寒光映蘭槳
斯人偉矣真罕儔
飄飄儼若神仙流

披圖一覽發清興彷彿萬里江南秋

元夕賜觀燈

象緯臨天闕瑤臺集萬靈雲霞紛掩映星斗疊晶熒
寶地春應滿金門夜不扃千官陪宴樂拜舞在明庭

鑑湖一曲為史院判題

見說山陰道湖光一鏡秋遠含晴日動迴帶晚烟浮
花發連堤樹帆飛隔浦舟橫塘空有夢未許賦歸休

楊溥一首

溥字弘濟石首人建文庚辰進士除翰林編修
靖難後轉太子洗馬宣德初以太常卿兼學士
直內閣歷官少保武英殿大學士諡文定有集

詩話三楊位業並稱
南楊詩名獨不振

楊思敬東郭草亭燕集

芝蘭本同氣桃李自成蹊
感彼歲易邁肯與心賞違
迨迨禁城東桑麥連重畦
聯轡縱遐覽我懷浩無涯
惠風煦澄景微雨浥芳姿
人生有至樂舉觴歌於斯

胡廣 二首

廣字光大廬陵人建文庚辰賜進士第一更名靖除翰林修撰靖難後直內閣復名廣累官文淵閣大學士卒贈少師禮部尚書諡文穆有晁

菴扈從集

楊東里云胡公賦詩取適性情近體頗得盛唐之趣

詩話楊東里楊白花云楊白花逐風起含霜弄雪太輕盈蕩日搖春無定止樓中佳人雙翠顰坐見紛紛渡江水長水闊花渺茫一曲悲歌思千里胡光大楊白花云楊白花渡江竟不還非汝故來急恐落泥塗問春光憔悴如花顏相思不見空長歎浮雲流水何漫漫安得隨風返

高樹仍結柔條莫飛去世傳素景文賦此題蓋
緣讓皇遜國而作然則兩公詩亦不無故主之
思矣然邪否邪詆光大者謂金川門之變約周
紀善同死既而人偵之尚在餽豕果爾則可鄙
已甚觀集中過顯平原文信國余青陽祠輒有
弔古之作其題宋思陵所書洛神賦云靜夜焚
香閱舊書洛神下筆意何如可憐不寫平戎策
千古中興恨有餘汴水園林迹已荒南來宮館
燕錢塘卧薪有志圖恢復好寫招魂酹岳王其
辭悽惋不類牧豬奴東里尤與相契胡語楊曰
吾兩人實兄弟後死則銘及胡沒後楊夜夢偕
胡泛舟自快閑至郡城下聯句胡云金螺滿灑
對芙蓉楊云鷺渚漁舟窈窕通遠樹白雲秋色
淨胡云故人清興酒船同河山夢冷謳吟後楊
覺而續之云生死交深感慨中猶想勝緣如夙
昔泣騎黃鶴過江東永嘉謝庭筠為作圖相傳

東里亦與純善誓同死後語其子曰吾若偕亡
誰與尊公作傳豈兩人品行相近故友誼諄諄
若是耶

滕縣隨獵

隨獵入深山山深多乳虎虎見人來却負嵎人一向之
觸而怒羣犬聞虎聲競趨至虎傍下口亂咋虎莫當犬
視齧虎如齧羊昔聞泰山麓有虎相馳逐尼父駐遊車
下問婦人哭嗚呼安得此犬在當時盡驅猛虎食其肉
重陪駕至太液池

玉砌臨無地飛甍上倚天微風斜舞燕高柳沸鳴蟬芳
草茸茸細池荷箇箇員孰知丹禁裏別有好林泉

金幼孜一首

幼孜初名善以字行新淦人建文己卯舉人授
戶科給事中靖難後改翰林檢討歷右諭德掌
翰林學士陞文淵閣大學士歷官太子少保禮
部尚書兼武英殿大學士卒贈少保諡文靖有

北征集

詩話文靖扈駕北征大漠窮沙靡
不身歷故其詩時露悲壯之音

元夕觀燈應制

閭闔重重夜不扃瓊樓十二敞銀屏東風一曲昇平樂
此夜都人盡許聽

夏原吉一首

原吉字維詰湘陰人以鄉薦游太學選授戶部
主事建文初擢戶部右侍郎靖難後進尚書遣
視江南水利歸掌行在吏禮兵部都察院事仁

宗即位復戶部尚書加少保兼太子少傅宣德
五年卒贈太師諡忠靖有集

詩話長陵靖難而後瑞應獨多黃河清甘露降
嘉禾生醴泉出卿雲見野蠶成繭麒麟騶虞青
鸞青獅白雉白燕白鹿白象玄兔玄犀史不一
書甚矣天之難詎也當時詞臣爭獻賦頌夏公
長律會粹而詳書之具見閎麗讀之如覽西周
王會之圖披北魏南齊符瑞之志亦可云詩史
矣特魚虞模並用殆
猶遵洪武正韻乎

聖德瑞應詩

聖主膺乾運垂衣馭八區道隆堯舜比功茂禹湯俱蕩

蕩三邊肅熙熙兆姓娛普天歌至治率土發靈儲爰有
諸蕃國能忘萬里塗隨槎超瀚漫獻瑞効勤渠渺渺來
中夏惓惓覲帝居麒麟呈玉陛獅子貢金鋪紫象靈山
種驊騮渥水駒駝雞同鸞鷟文豹擬駟虞福祿身紆錦
靈羊尾載車霜姿援更異長角獸尤殊綵檻竒音鳥雕
籠雪色烏玄龜三尾曳山鳳五花敷日上龍墀麗風回
貝闕迂禮官躬典設蕃使肅奔趨仙掌開丹宸祥烟散
紫衝重瞳欣一顧百辟震三呼茲豈尋常致端由治化

孚既將昭帝德尤足壯神都炎漢何能擬姬周莫竝驅
拜瞻嗟慶幸稱贊媿荒疎惟願皇風洽仍祈化日舒鴻
圖千載固聖壽萬年餘

黃淮一首

淮字宗豫永嘉人洪武丁丑進士除中書舍人
陞翰林編修歷侍讀左庶子進右春坊大學士
輔東宮繫詔獄十年洪熙初入內閣兼武英殿
大學士累官少保戶部尚書卒諡文簡有介菴

省愆歸田等集

詩話長陵北征留文簡輔皇太孫漢庶人中以
蜚語繫詔獄十年遂以省愆名集集中詩所云
寶劍薤臺城爛斑土花碧又云十年頓足團扉
閒時向牆頭看柳色是也因是受知宣廟特深
當其入朝賜游西苑肩輿登萬歲山宴太液池
親灑宸翰贈行有云朝旭光升紫殿清相對清
言良慰情留之累月不盡意歸心又欲東南征
雁宕峯高高不極中有謝公舊遊蹟采芝劉苓
可長年應在天南憶天北
君臣相悅可謂千載一時

勵志

猗猗者蘭于彼空谷悠悠我思曷云其穀猗猗者蘭維

芳維馨我有好爵君子攸寧蘭之榮矣繁霜瘁之靜言
孔念中心悵而蘭之瘁矣益厚其根我之懷矣匪善奚
敦蘭之瘁矣芳華載陽淑慎其身終焉允臧

李至剛 三首

至剛名銅以字行松江華亭人洪武中舉明經
試禮部郎中出為河南布政司參議永樂初以
薦擢右通政拜禮部尚書兼左春坊大學士

詩話尚書無詩名
其僅存者頗娟秀

題王孟端送行圖

汀州杜蘅歇南浦西風生美人鼓蘭楫路指江南行南
行向何許東望吳松去吳松秋水多綠遍芙蓉渚渚外
九龍山山邊三泖灣人家臨水住日暮采菱還采菱歌
易斷送子愁零亂愁來可奈何思滿江南岸江南不可
思動子情依依皇都春色早遲子速來歸

朱澤民秀野軒

幽居遠城郭寂寞自成村野色還通市春潮直到門竹

窗晴曬藥花塢晚開尊想象其中趣何由得具論

趙子固水仙

水精宮闕夜不閉仙子出游凌素波為愛低頭弄明月
不知零露濕衣多

趙 玠一首

玠字雲翰祥符人洪武丁卯舉人授兵部主事
遷員外陞浙江右參政命使交趾還擢刑部右
侍郎改工部復改禮部尚書尋改兵部再改刑

部有倉父集

詩話尚書識于忠肅於弱齡可謂具知人之鑒
忠肅序其詩云尚書雍容廟堂之暇發為辭章
長篇短什操楮立就有沈雄而典重者有舒徐
而優柔者有平衍而沖淡者有光采煥發而豪
宕放逸者有清新流麗而愜慨懷悅者變態不
一豈區區拘泥聲律摹仿前人於萬一者之可
擬哉其稱許未免過
情蓋知己之感深矣

城南書事

三年為客寄龍沙望斷南雲不見家惟有受降城外月

照人清淚落悲笳

陳

卧子云頗有嘉州之風
蔣仲舒云一字一淚

黃福 二首

福字如錫昌邑人由鄉貢仕為主簿累官戶部
尚書卒贈太保諡忠宣有後樂堂橐

過武昌

城頭黃鶴樓城外鸚鵡洲
觚稜出漢表葭菼分江流
樓棟白雲暮接天芳草秋
我來吟不盡沽酒載行舟

長沙懷古

漢庭求士急洛下賈生賢
損益乃長策紛更真少年
楚

江魂不返宣室席空前一擢西風過令人倍惘然

陳璉九首

璉字廷器東莞人洪武中以明經薦為桂林教
授遷國子助教永樂初知許州改滁州尋以揚
州知府攝州事擢四川按察使入為南京通政
使掌國子監事終南禮部侍郎有琴軒集

詩話琴軒詩較仲衍不及
視雪蓬聽雨諸君似勝之

游新安爛柯山王喬洞

峨峨爛柯山日夕生紫煙仙人啓洞府澗水導其前白石寒齒齒幽篁靜娟娟紺露泣瑤席慶雲集蕙楊冷風從東來可以散煩悵萬變紛在目汎覽何茫然王事有嚴戒胡能久周旋振衣下山去滿耳淒鳴蟬

蘇小小墓

蘇小家錢塘橋李有遺墓芳姿竟何在碑石宛如故光陰百歲短聲色幾人悟可憐墓前花涓涓泣秋露

曉發麻沙夾

昨暮維輕舸蕭條近沙渚蓬窗倚蒹葭淅瀝鳴秋雨晨
興喜光霽萬象爭快覩雙帆駕順風如鳥插新羽潮來
海氣腥浪起雪花舞行望鐵甕城雲邊見樓櫓

羅稚川山水歌為孫伯貞賦

郭熙後有羅稚川妙畫往往人爭傳醉來乘興埽輕素
下筆蕭颯生雲烟天台鴈宕宛相似仙樓佛閣紛滿前
春風瑤草發幽澗暮雨藤蘿垂古阡危橋半空度羸馬
斷崖千尺飛寒泉扁舟一葉欲何往人家多住沙岸邊

牛羊雞犬各成隊武陵何必求神仙我亦平生好清致
出山自笑歸無緣還君此畫三歎息羅浮東望心悠然

哀洗口有序

南漢禹餘宮東西招討使內侍監上柱國邵廷
琄劉鋹愛將也宋太祖受禪廷琄言於鋹曰漢
承唐亂居此五十年幸中國有故干戈不及而
漢益驕於無事然兵不識旗鼓而人主不知存
亡夫天下亂久矣亂久而治自然之勢也今真

人已出必將盡有海內其勢非一天下不已宜
修兵為備不然率珍寶奉中國遣使以通好銀
惜然不以為慮及宋師南伐銀所遣將戰死始
思廷琄言命廷琄以舟師出洗口有譖之者銀
遣使賜死士卒排軍門訴無反狀不能救為立
祠洗口廷琄東莞人邵村居者即其遺族

哀洗口天為愁海風吹鬢寒颼颼五羊城頭天狗墮南
漢霸氣應全收天吳海鯨恣吞噬漠漠妖氛徧南裔皇

風聞已暢中原嶺海瘡痍待湔洗
禹餘宮使輸忠言主聰不悟誠堪憐
舟師甫自屯洸口此身已殞讒人手至
今山下有遺祠日色慘澹行人悲

得家書聞舍弟琦來京喜而有賦

偶得鄉人至今秋道爾來家書千里發
懷抱一時開準擬同聯句安排共舉杯
從今思更切頻上鳳皇臺

曉過黃州

黃州竹樓雪未晞獵獵寒風吹客衣
征帆此時向東去

行李何日從南歸
青山幾點煙際出
白鳥一雙江上飛
欲訪蘇公舊游處
倚篷回首思依依

七星巖

六丁何年開翠岑
穹窿石室高千尋
煙生丹竈火常在
花落碧桃春又深
倚巖懷古有誰會
埽壁題詩還自吟
日華月華去已遠
玉笛誰能傳妙音

宿龍泉寺

歸鶴翩翩帶夕曛
上方鐘磬隔林聞
不眠一夜聽春雨

起視四山生白雲自是遠公偏好客獨憐支遁最能文
閒身安得頻來此細草長坡數鹿羣

胡儼四首

儼字若思南昌人洪武末會試乙科授華亭教諭
永樂初擢翰林檢討同解縉等直內閣尋遷
國子監祭酒洪熙元年加太子賓客致仕有頤

菴集

熊伯幾云若思篤學好古辭氣英邁足以追蹤作者胡光大云若思溫厚雅瞻而

有疎宕之氣鄒孟熙云賓客鋪張至治富瞻不窮楊東里云若思體物緣情端厚微婉

李時遠云賓客詩
豐蔚為時所重

詩話長陵靖難之後簡詞臣入贊機務者七人
踰年而解大紳胡若思出績入者王行儉楊弘
濟久而王亦出以是相業盛稱三楊論世者謂
解王胡三公才品學術在三楊之右使其不出
發於事業必更有可觀者然揆之以時度之以
勢有所不能也賓客學文於鄉先生熊劉伯幾
伯幾學於虞集伯生故其
文有原本詩亦近西江派

遠將歸

去年與郎別楊花飛白雪今年候郎歸楊柳綠依依聞
郎買船下湘渚日日門前望旅行人過盡乳鴉啼徘徊

白日暮空延佇攬衣回洞房對鏡卸新妝那知清漏短
但愛明月光月光照席涼於水帳裏燈花撒紅蕊好事
從來不浪傳明日升堂拜姑喜

村居秋興

草蟲階下鳴夜久猶未歇掩卷坐闌寥秋聲振林樾人
生知幾何憂來不可輟風吹浮雲開送我半窗月逍遙
步前庭孤螢自明滅

姑蘇

姑蘇城郭水茫茫往事流傳過客傷
夜月人歌黃菜葉秋風夢繞白駒場
火中烏合歸真主井底蛙猶笑子陽
天下車書今混一繁華終古勝維揚

直閣即事

清曉朝回秘閣重坐看宮樹露華濃
綠窗朱戶圖書滿人在蓬萊第一峰

尹昌隆一首

昌隆字彥謙泰和人洪武丁丑賜進士第二授

監察御史永樂間改左春坊中允再改禮部主
事為尚書呂震所誣族誅有集

送孟潛陽先生教授邵武府學

理櫂辭京都之官越閩嶺樵峰渺何許川塗邈脩迥霜
雪歲暮餘朔風吹雲冷嚴程既難滯別思當自領清波
漾寒色孤帆明夕景已過落星灣遠望杉關境橫經守
清秩郡教知獨秉遐想諸生徒三席待開省

吳溥 三首

溥字德潤崇仁人建文庚辰進士授翰林編修

永樂初陞修撰遷國子司業有古崖集

胡若思云先生

志不事浮藻故其詩質實不浮殆所謂布帛菽粟而溫厚和平之意藹然見於辭氣之表其視

世之纖媚工巧者不侔矣

詩話博士聘居尊人詩格楚楚不若聘君之塵腐滿楮也

寄宋子環

聖恩寬逐客不遣過輪臺
談笑潼關去雲霞仙掌開
故鄉深念汝遠道竟能來
明日相思處高秋鴻雁迴

自歎

去鄉三十年顏貌總非昔昨日鄉人來相看不相識

悼外姪戴積善

遠樹千重暗江聲日夜哀終南山下路不見汝重來

王景一首

景字景彰以字行松陽人洪武壬子領浙江行

省鄉貢進士授懷遠教諭遣戍雲南建文初召

修高廟實錄陞禮部右侍郎兼翰林院侍講充

副總裁官靖難後進學士

詩話靖難師入相傳學士請葬建文君以天子之禮然鐘山不聞有封穴或請而不允也古風二首其一不無故主之思因錄之

古詩

皇天無停樞四運迭相迫朝陽忽東升悵望倏已夕伊誰執其馭六轡不遑息使我下土人俯仰空役役我願攀六龍駐彼扶桑域遨遊黃道中流光自輝赫萬物同一春欣欣布嘉澤義和不我與徒有淚霑臆晝短夜乃

長何以屏陰慙

王達二首

達字達善無錫人洪武中舉明經為大同訓導

薦入官國子助教永樂初擢翰林編修遷侍讀

學士有耐軒天游二橐

黃才伯云耐軒詩有唐人風韻

詩話耐軒與大紳孟散汝玉希範號東南五才子其詩太便利不耐咀嚙然如送人人都作起句云鶯啼細雨中一騎發城東又送人從軍作云細雨都門酒東風驛路塵未嘗不矜練也

題山水

一曲清琴酒一卮
煙蘿贏得任棲遲
千峰黛色嵐消後
十里菱花子結時
水氣入樓人不覺
秋聲到樹鶴先知
世無謝眺誰同語
對畫空成萬古思

題扇

葉暗前朝雨
花飛昨夜風
空山人不見
春在綠陰中

王璫
五首

璫字汝玉
後以字行
長洲人
洪武中舉
浙江鄉試
以薦攝府學教授
改應天訓導
擢翰林五經

博士永樂初進檢討再進春坊贊善下詔獄死

洪熙初贈太子賓客諡文靖有青城山人集

徐子

元云汝玉不及
高楊漸入清雅

詩話翰林四王並稱而汝玉弟璉汝器璉汝嘉
一門又有三馬其詩不費冥索斤斤唐人之調

吳人徐用理集永樂後詩家
三百三十人以汝玉壓卷焉

和高季迪將進酒

君不見雲中月清光乍盈還又缺君不見枝上花容華
不久落塵沙一生一死人皆有綠髮朱顏豈能久尊前

但使酒如澠肘後何須印懸斗臨卽鑪頭綠蟻香楊花
卷雪春茫茫吳姬越女嬌相向痛飲須盡三千觴興來
狂笑縱所適慎勿畏他權貴客東風吹落頭上巾此夕
獨醒端可惜

題採菱圖

有序

苕溪余舊所經游秋高氣淒風清水落遠近漁
歌更唱互答舟行沿洄恍若世外別來不知幾
寒暑矣中吳徐希孟攜謝孔昭所臨松雪翁採

菱圖索詩為作吳歌題其上不能不動江南之
思也

湖南風信起湖北浪花多欲唱採蓮曲翻成採菱歌採
菱歌斷汀洲暮何處却尋歸去路誰搖蘭艇笑相迎燈
火遙生白蘋渡

新秋早朝

宮井梧桐一葉飛新涼先到侍臣衣蒼龍闕上銀河轉
丹鳳樓頭玉漏稀曉仗分行環御輦夕郎鳴佩出仙闈

自憐虎觀叨陪從簪筆慙無補萬幾

瓜洲道中

清江杳杳水連空江北江南綠映紅三月異鄉逢換火
經春游子怨漂蓬滿汀蘆葉鹽檣雨一樹梨花酒旆風
遙望故山何處是依稀煙霧五湖東

方壺畫

紫府深沉白晝閒仙人歸去邈難攀當時暫謫來塵世
寫遍江南雨後山

王洪五首

洪字希範仁和人洪武丁丑進士授行人永樂

初擢吏科給事中入翰林為檢討歷修撰侍講

左遷禮部主事有毅齋集

徐子元云希範詩清雅惜氣不足吳明

卿云希範擬陶風味似晉舟中
雖興聲調似唐皆非人所易及

詩話希範詩最為孟敷所重至不敢與雁行其
對張宗海論詩自誦所作竊比漢魏張昞而未
荅復曰終不作六朝語張曰子詩傍大李門牆
猶未窺其奧也希範始屈服今誦其詩率規仿

唐人具體而已
品當在孟敷下

歌風臺

赤精自天啓黃屋凌空開富貴歸故鄉遂築歌風臺佳
人弄瑤瑟故老持金罍酒酣自擊筑浩歌何雄哉颯爽
龍虎姿曠蕩風雲懷顧為萬歲後英魂尚歸來回首望
彭城孤臺亦崔嵬百戰功不成千載令人哀

擬劉公幹

園林多嘉木秀氣何蒼蒼石梁冠崇阿潒水流方塘行
樂在良夜飛蓋復翱翔涼風振華纓明月揚其光清池

金史卷之三
集十九
散芙蓉秋蘭一何芳君侯壯思發逸藻凌風揚小臣信
愚劣狂歌安所詳

擬陶彭澤

我家南山下前有嘉樹林好鳥鳴其顛涼風吹衣襟泛
此尊中酒撫我膝上琴黍亦已繁桑麻藹餘陰如此
良易足勞生非所任

畦樂詩

索居南野外頗與人事疎灌木蔭前庭隙地數畝餘蔬

果因時藝薄言理其蕪聊以足晨夕過茲奚所須固窮
亮吾分貪得寧非愚草糗可終身樂哉常宴如

舟中雜興

故國遍芳草高臺多大風河山千古在登眺幾人同野
澤鳴山雉荒陂起塞鴻新豐不可見煙樹五陵東

王

紱

十七首

紱字孟端無錫人洪武中就徵坐累戍朔州永
樂初以善書薦供事文淵閣拜中書舍人有友

石山房橐

胡光大云孟端律詩學大厯諸才子時有警句章明如云孟端不羈之

才所作古詩類韋柳律詩類晚唐曾子啓云孟端觸景撫事即形之於詩隨其興之所至情之所發初不計其工拙而自合矩度王汝嘉云孟端幼負瑰偉之才游學邑庠時鄉之先進若四輔官周士平侍請學士王達善長史錢仲益教諭呂志學引禮舍人浦長源輩皆以詩著名於時過從廩和甚為諸公稱許集中長篇短章春容爾雅無斧鑿痕而理趣兼至李時遠

云舍人詩清新典麗想見其人天自云舍人詩格踈爽有松石間意

繆

詩話錫山自倪元鎮後孟端山水竹石滿瀝出塵筆蹤可繼人品亦未多遜在京邸與一商人鄰居月下聞吹簫聲明日往訪之寫竹以贈曰我聞簫聲用以簫材報其人不解事以紅璫輸

為餽乞再寫一枝為配孟端大笑取前畫裂之
又嘗退朝點國公從後呼之孟端不應私念曰
是必索我畫爾後十年寫尺幅萬里遺焉予嘗
見孟端為惠山僧畫竹茶壚圖羣賢題咏其衆
今存顧典籍貞觀山莊當時夏太常景亦善寫
竹儲藏家得其十幅不敵孟端之一也詩亦清
疎一如其畫章舍人昉如狀云永樂初詔求天
下文章之士洎善書者各二十八人登文淵閣
公被首薦蓋與吉士泣入
直者此國史所未詳也

送楊德昂

我適桑乾歸君猶五溪去飄流若萍梗何繇復相遇迨
迨江上山歷歷煙中樹後夜月明時相思渺何處

題秋菊軒

九月霜露零秋色已云肅草木盡彫瘁而有籬下菊粲
粲如有情盈盈抱幽獨我欲餐其英采之不盈掬呼兒
具雞黍白酒正可渡素心二三人於焉叙心曲陶然付
一醉萬事亦已足詠歌柴桑詩千載想遐躅

寫竹寄顧謹中

秋聲起巫峽暝色迷湘渚悵望千里遙佳人渺何許幽
期邈難值欲往復延佇中夜獨遐思西窗颯風雨

題成趣軒

桑麻日已長稼穡日已成
門巷蔭榆柳隔屋縑車鳴
生平寡營為遂此田園情
衣食喜不乏公賦尤寬平
舉家情欣欣澹然忘世榮
力作雖云勞濁酒時共傾
豈意事高尚所樂安吾生

臘日

大化無停機寒暑如循環
歲華忽云暮陽和亦已還
人生百年內憂喜互相關
顧匪金石姿安得長朱顏
達人會

斯理意與雲俱閒聞道愧獨晚衰也吾何歎

題青山白雲圖

我昔九龍山下住結廬正在雲深處日日看山還看雲
長教剪却當檐樹無端一別猿鶴羣馬蹄南北徒紛紜
塵塗底事拂衣晚回首愧負山中雲

送張知縣

作宰麻陽去民風雜五溪世傳盤瓠後地接夜郎西臘
釀多藤酒春禽半竹雞到官應有便莫惜寄緘題

靜趣軒

竹樹陰森映短牆蕭然絕俗似僧房
出城相去路三里閉戶獨眠書半牀
風煖林花飄几席雨晴沙鳥入池塘
慚余擾擾紅塵客到此猶能百慮忘

送陳尚賓還靖州

嗟余湖海度年華爾復飄零更可嗟
舊業斂歸翻似客異鄉重到即為家
江連雲夢孤帆遠日落衡湘斷雁斜
後夜月明何處泊相思回首各天涯

峽中雜詠

峽裏山高多晝陰
未昏煙景暗秋林
停舟晚飯柁樓底
猶有夕陽明遠岑

靜樂軒二首

竹兒藤牀小硯屏
熏風簾幕篆烟青
閒齋幾日黃梅雨
添得芭蕉綠滿庭

斗帳藏春日醉眠
靜中惟與嬾相便
尋常甲子無心記
看得梅花又一年

皆山軒

嵐光飛翠入簷楹
枕簟生涼暑氣清
公退日斜新浴罷
坐看峰影過州城

塞上雜詠用偶武孟韻

漫天風雪掩穹廬
客裏誰來問起居
忽報鄉人喜新到
寄來猶是隔年書

題靜照軒

尋常客不到山家
松火寒爐自煮茶
風雪閉門才十日

不知春已到梅花

題枯木竹石寄李公實

罨畫溪邊水拍隄繞隄高樹倚雲齊
君家正在樹深處滿地綠陰山鷓啼

茅齋煮泉圖

小結茅齋四五椽蕭蕭竹樹帶秋烟
呼童埽取空階葉好煮山廚第二泉

錢仲益八首

仲益無錫人永樂初以翰林編修轉周王府長

史有錦樹集

魏仲房云先生詩有體裁麗而不浮奇而不僻易而不俚

詩話長史詩格爽朗惜遺集罕傳予從秦對巖前輩購得亟錄其八首猶未盡其蘊也

送范宗暉赴雲南從軍

投老怕送別送別即傷神况茲所別者乃是平生親行
行赴何許遠在天之垠迢迢萬里餘欲見將何因近別
猶不堪遠別情曷伸翻嫌交密友不若交疎人我昔初
還鄉憔悴賤且貧子來客吾邑漂泊埋風塵一見如舊

識歲久情逾真自謂同心交不獨雷與陳我入訓鄉校
子來寓城闔燕語恒及酉諷詠或達晨中間羅變故別
我遊江濱陶朱既遠越張祿遂入秦間關幾四載會晤
復喜頻明年上京都聘充戚里賓我亦被薦書謁選拜
紫宸繆居容臺屬幸得聯朝紳與聞復聚首相見不隔
旬念子有俊才倜儻無儔倫財輕大義重實謂勇且仁
願言永相從誨語煩諄諄夫何事難料告別何踈踈從
軍赴滇陽西去逾峨岷吾皇啓昌運萬物皆維新及茲

豔陽月鶯花曜青春惜子獨遠去書劍行隨身騏驎豈
絀羈鵬鶚非籠馴丈夫志四方豈必長相憐嗟我已暮
齒雙鬢垂秋銀受刃割老腸容易生酸辛予時在史館
寅入出已申不暇持一觴送子龍河潯江之水滔滔楚
山青嶙峋咄此可奈何淚下霑衣巾

題王孟端畫送祖韶石歸惠山

危石壓寒篠高松挂枯藤長懷故山景况見故山僧僧
今歸故山我歸嗟未能題詩送僧歸悵然離思增

中秋翰林夜集分韻得月字

雨餘殘暑謝夜久官事歇庭空起商飈雲霄吐華月於
時秋方半古桂黃初發玉堂集僚友清燕足怡悅送鉤
行觴頻分韻催詩切玉輪懸中天光輝轉明潔有如坐
冰壺爽氣徹肌骨微聞更漏響漸見明河没人生寡歡
會員魄亦易缺莫辭通夕玩動是經年別

牧牛圖

東臯二月春草生江邊放牛花雨晴牧兒唱歌牛齧草

穩坐牛背隨牛行牛角攢攢耳濕濕斷隴荒陂隨意入
煙蒲風柳不勝情日暮歸來荷蓑笠我本山林牧牛叟
濫著朝衫今白首擬買江南黑牡丹乞取閒身老農畝

青山白雲圖

連山盤盤隔溪水翠滴風光淨如洗松梢日出初雨晴
滿地白雲收不起溪窮路轉石徑斜隔溪遙見山人家
柴門深閉人不見煖風吹落朱藤花良工貌得無窮景
坐玩令人發深省何由築室住山間長卧雲窩弄秋影

題江南春雨圖

羣山鶻哭雲模糊長蘿遠水連平蕪孤村絕浦望不極
幾家茅屋懸魚眾輕舟數點小於葉出沒烟浪同飛鳧
江空雨勢來不已水風颯颯吹菰蒲前山禪宮白雲際
明滅時見金浮屠貌將一段丘壑趣寫出萬里煙霞圖
憑軒寂聽無所見彷彿似有青猿呼我昔南遊會稽上
雲門六寺尋僧徒手支枯筇躡短屐窮幽陟險隨樵夫
曉雲漫天失老鶴暮雲擁樹聞飢鳥石厓松瀑濺飛雪

水流活活風胡胡若邪溪深不可渡沿流細路行縈紆
歸來濯足憩小軒胸中塵氣一點無自從江海困奔走
衝寒觸暑趨長塗追思勝賞不可到十年南望空嗟吁
朝朝覽鏡獨惆悵兩鬢雪白容顏枯東陽山人特好古
寶此名筆如瓊珠吳箋一幅不滿尺懷山卷海置座隅
鋪牀展軸看未了何異短褐藏天吳王郎妙手信莫及
功與小米論錙銖想當運意揮染際倒瀉水墨翻金壺
祇今此景在何處欲往不得歲已徂還君此畫重太息

嗒然長吟據槁梧

錢達可山房

苦憶錢夫子幽居嶧嶠山
問梅殘雪外采藥亂雲間
塵暗芸籤冷香銷蕙帳閒
斷腸泉上月依舊照松關

游蓬萊道院聽李天山鼓琴

仙人鼓琴花滿庭我亦洗耳為君聽
風搖空林夜瑟瑟泉落幽澗秋泠泠
平生青袍作行客千載絕調聞廣陵
曲終日落醉歸去無數好山天外青

梁

潛一首

潛字用之泰和人洪武丙子舉鄉試授訓導永

樂初召修實錄陞翰林修撰歷右春坊右贊善

帝北狩留監國中讒死有泊菴集

楊東里曰用之詩高處逼

宋晉

合州寫懷

忘却儒官冷誰為蜀道吟一身猶長物萬事豈關心水
鳥窺魚立山雲帶雨沉人生聊適意莫受族愁侵

鄒緝一首

緝字仲熙吉水人洪武庚辰進士除星子訓導
永樂初入為翰林檢討歷官左春坊左庶子有
素菴集

翰林院齋宿聽琴詩

并序

永樂三年春正月丁未上將祀南郊誓戒羣臣
致齋三日百官既受誓各就宿別館於是侍讀
曾公日章脩撰錢公仲益徐公孟昭檢討蘇公

伯厚沈公民則暨無錫王公孟端與予凡七人
皆會宿於翰林之公署於時天宇澄霽月色清
朗諸君子相與秉燭坐於公署之東偏沈公善
琴因請鼓之作商調數引舒徐安適淳古澹泊
有三代之遺音坐者聽之莫不心暢神怡乃相
與分韻賦詩以紀其事且要孟端為之圖云

禁直夜迢遞齋居澹無為同心聿來集良友具在茲懽
言適嘉會秉燭坐彈碁華月照虛牖微風動綺帷上客

發幽興援琴揮素絲一彈孤鶴舞再鼓心神怡清商既
激烈雅調亦舒遲秋鴻唳遠空猗蘭芳葳蕤俯仰極餘
韻邈與高山期燕賞亦云洽傾耳遂忘疲沉吟永終夕
逍遙起遐思仰觀庭戶間爛然明星垂旭景不知曙永
言歌此辭

蘇伯厚 二首

伯厚名埤以字行建安人洪武中以薦授建寧
府學訓導遷晉府伴讀永樂初擢翰林侍書遷

檢討以子鑑仕贈吏部員外郎有履素齋集

詩話蘇君傳詩絕少其五言神意閒審綽有魏晉風陳嗣初稱南閩偉奇起卓之士必以蘇先

生伯厚爲之
首不誣也

偕諸公齋宿聽琴作

玉署宿齋居盍簪諧素約坐中有鳴琴宮商時閒作波
澄楚江秋露下九臯鶴流泉響幽澗靈籟起寥廓維時
雨初霽微月映疎箔鑪熏輕煙裊燭花紅燼落春風送
餘寒夜久覺衣薄清談雜今古亦足資一噓相對竟忘

眠更取茶甌淪雞鳴整朝冠晨鐘動高閣

畦樂詩

青山遶我屋垂柳蔭我門來往絕塵鞅世事邈不聞惟有衣褐徒鄰曲相與言孰云生計拙亦有數畝園清晨荷鋤去除彼蔓草根但使無饑饉豈惜筋力煩濯足清澗濱矯首觀飛雲牀頭有濁酒欣然自開尊

張洪一首

洪字宗海常熟人洪武中謫戍雲南永樂初授

行人仁宗召入翰林改修撰有集

詩話張宗海集一冊予在史館曾見之無足采者仍錄東門行一首

古東門行

僕夫顧我悲轅馬蹶不行古來離別地青草不復生居
人攀桃李悵望難為情流塵起阡陌遠樹花冥冥莫向
秦東亭唱此東門行土中有死骨聞之復心驚

曾烜二首

烜字日章以字行吳江人洪武間以歲貢授黃

陂知縣考最陞翰林院侍讀同修永樂大典使
交趾交于富良江

舟至辰陵磯與楚百戶言別

江到荆湘兩派分客情無奈况離羣爾從三峽迎春水
我過重湖望楚雲白帝至今啼蜀魄蒼梧何處弔湘君
孤舟夜向巴陵泊一曲商歌不忍聞

寄友人

與君離闊十年餘雨過江濱候起居咫尺猶如千里別

飄零不寄一行書何時夏口同傾蓋此日王門好曳裾
若問故人何似者鬢絲今已不勝梳

黃守一首

守字約仲以字行莆田人以汀州府學教授擢
翰林院檢討有靜齋集

題燕文貴秋山蕭寺圖

迴崖列岫鬱相連兜率樓臺際碧天飛鳥已還秋色裏
疎鐘猶在夕陽邊溪橋緩轡官人馬野飯維稍客子船

金八日人
卷十九
記得宦遊逢此景披圖不覺思茫然

虞謙一首

謙字伯益金壇人洪武中由太學生擢刑部郎
出知杭州府永樂中召為大理寺少卿仁宗監
國奏除都察院左副都御史轉大理卿有玉雪

齋橐

楊東里云大理善窩山川木石
出澹簡遠亦以工詩名於時

田家晚泊

風磴翻危葉霜槐出斷根過橋逢野老倚杖候柴門馴

犬熟迎客歸鴉遙認村茅檐投晚泊煙霧斂初昏

熊直二首

直字敬方其初冒姓胡吉水人永樂中舉人以
子槩貴贈右都御史有西礪集

立秋後有懷京洛諸故舊

秋序昨夜至炎蒸尚復然青山不改色黃葉墮我前物
性固細微乃得氣之先人生宇宙間俛仰終百年質非
金石固豈得恒雕鐫朱顏亦易失皓髮無由玄念我平

生友聚散如雲煙行止固不齊所賦良由天昨尋東籬
菊欲買南山田安分乃吾事富貴甘棄捐

瀟湘雨意圖

萬竹叢深日未晡寒江煙雨翠模糊東風無限瀟湘意
獨倚蓬窗聽鷓鴣

陳

繼二首

繼字嗣初吳縣人經歷汝言子用薦授五經博

士領弘文館事進檢討有怡菴集

詩話嗣初為惟允遺孤惟允坐法誅家無長物
惟閱過書二萬餘卷其母吳教之成學以薦授
五經博士時獻陵於大內之西思善門闢弘文
館命楊學士溥主之嗣初與王侍講璉入直焉
其詩本之家學持論以為詩者非得乎天地之
清氣則無以極其妙今所存怡菴集一十五卷
詩未之錄嘗見題漁父圖有云夕陽漸
紅江轉綠分明畫出一幅漁村晚景也

烏夜啼

宮井烏啼宮樹碧月色生寒露華白啞啞不斷深夜間
明朝車馬天際還綠窗美人歡不寐未曉凝妝貼珠翠
秋夜雨中懷施孟端

金八四卷
卷十九
愁雲接地陰城漏更沉沉寒雨驚秋盡殘燈入夜深淒涼千里客惆悵百年心誰料分攜後防邊直到今

陳亢宗一首

亢宗名宗以字行永嘉人官兵部員外郎

詩話員外午門觀燈應制詩景陵品居第一然
宵避曾襄敏陳文定諸公送友一律調雖荏弱

源本

隨州

送友人歸崑山

官亭把酒送君歸回首吳山驛路微久別方期同笑語

相逢那忍又分違
平蕪積雨迷征騎
疎柳寒煙掩舊扉
此去思親還望闕
朝朝應對白雲飛

袁珙一首

珙字廷玉鄞人以相術拜太常寺丞有柳莊集

詩話寺丞得相法於別古厓識文皇於潛邸遂
遷寺秩然家本土族其父彥章仕元為翰林國
史檢閱世稱菊村先生嘗作布衣歌云我家頗
讀書初非田舍翁蓋道其實也寺丞於九流百
氏靡不涉究歌詩亦能
入格不失菊村家數

長相思

有美人兮天一方丹霞為織雲錦裳盤龍舞鳳交鴛鴦
昔年飲我瓊瑤漿贈我白玉雙明璫欲往從之楚山長
安得羽翼同翱翔望望不見令我傷仰天悲歌涕浪浪
明月在戶光滿堂牽牛織女遙相當長相思愁未央

素忠徹一首

忠徹字靜思珙之子以父蔭由鴻臚序班歷官

尚寶少卿有符臺外集

和寔郎中罔竺菴見贈韻

夕雲斂餘暉稍稍歸鳥集清磬林際浮樵歌峰外急懷
人南斗邊露下銀漢濕瑶草春復生深山共誰拾

徐晞一首

晞字孟晞江陰人永樂中由縣功曹累官至兵
部尚書有暨陽遺橐

感懷

十年騎馬戰龍沙不道功成兩鬢華昨夜思歸有鄉夢
江南春色遍梅花

劉 廌 二首

廌字士瑞青田人誠意伯基之孫洪武庚午襲封卒未貶秩丁丑戌甘肅尋赦還永樂中卒于

家有盤谷集

詩話趙周臣自號間間居士士瑞亦自號間間子其集名盤谷者士瑞襲爵之後貶秩歸農築室于青田舊宅之西雞山之下因其地山水盤旋故以名焉詩師吳興沈原昭

孟春贈徐仲成

故人訪幽居時當孟春節寒氣尚嚴凝同雲靄欲雪長

論懷始舒高吟興不絕開窗對松竹蒼翠色可悅豈不
念榮華泉石甘守拙開門有餘暇開卷對前哲長歎古
今事理義同一轍世隨氣化遷運逐人情別雖非聖賢
資勉焉慕貞潔斃斃且獨守默默誰與說惟有知心友
時過共振揭但願無聞知豈敢尚英傑援筆賦新詩舉
觴對明月高歌神鬼驚長嘯天地闊彭澤千載人百世
誰能越高山與流水此興不可遏

春游田家四景之一

竹籬茅舍兩三家屋外青山綠樹遮行客偶來春已暮
山南山北杜鵑花

郭武

五首

武字吳隆贈定襄伯鈺長子官尚寶司丞詩見

聯珠集

晚渡白馬湖

輕風小寒吹浪花新柳茸茸啼乳鴉平湖一望幾千頃
遠水連天飛落霞斜陽忽墮澄波底白鳥猶明山色裏

嚴更何處鼓鼙鼙擢歌未斷漁燈起

寄劉草窗原博

空堂獨坐葉紛紛一雁南飛不可聞
野色連天迷遠望
高城落日亂寒雲
故人眼底無多在
客思秋來又幾分
莫怪臨風倍惆悵
江鄉猶憶白鷗羣

江南懷古

隔斷中原數百年
囊沙堪笑況投鞭
桓溫不合留王猛
安石終能舉謝玄
日落暮雲斜度鳥
雪消春水遠連天

子山空有江南賦北府淒涼最可憐

江上即事

綠水橋邊酒店白鷗沙上漁家山前山後春雨江北江南落花

宿澧陽

蘋花風急水茫茫今夜孤舟宿澧陽誰在江城吹畫角
五更殘月一天霜

沐昂一首

昂字景顥黔寧昭靖王之子以左都督鎮守雲
南卒贈定邊伯諡武襄有素軒集

詩話定邊平麓川之寇威著西南而能以餘暇
留情文詠輯明初名下士官於滇及謫戍者自
邾仲經以下二十一家詩凡二百五十首目曰
滄海遺珠揚東里序之謂當時選錄諸家劉仔
肩過略王偁雖精且詳猶未免有遺惟沐
公所擇和平婉麗可玩可傳其賞識若此

送胡楂軒還永昌

有客乘驂過洱西平原春草正萋萋人煙迢遞連金齒
山勢逶迤拱碧雞流水小橋楊柳綠落花微雨鷓鴣啼

遙知別後相思處
雲樹蒼茫夢欲迷



明經綜卷十九